

Wednesday, March 11, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

CM

Chief Minister Pu Lalduhoma'n Kaladan Multi-Modal Transit Transport Project (KMMTTP) kaltlangin dan kalha sumdawna nasa taka kalpui mek chu sorkar hriatpui a ni lova, tih ngaihna vak a awm rih lo a ti.

House Leader, Chief Minister Pu Lalduhoma chuan he thu hi vawiin Assembly thutkhawmah sawiin, KMMTTP road awmna ram chu Myanmar sorkarin awp tawh lovin, Arakan Army thunuaiah a awm tawh a ti a, Arakan Army te nen thawhhona tha tak an nei tih sawiin, anni pawhin KMMTTP road chu an nghakhlel tawh hle a, KMMTTP hawn chuan nasa takin Mizoram a nghawng dawn avangin lo inbuatsaih lawkna turin Lunglei West Bialtu Pu T. Lalhlimpuia chairman-na hnuaiah Impact Study Team an din a ti.

Tuna KMMTTP kaltlanga sumdawna nasa taka kalpui mek chu dan anga tih a ni lova, sorkar pawhin a hriatpui lo a ti a, hetihual hian Land Customs Stations (LCS) te an neih loh avangin Impact Study report thehluh a nih hma chu tih ngaihna vak a awm rih lo a ti a, Myanmar atanga KMMTTP kaltlanga Lawngtlaia lut tam lutuk erawh chu an vei hle tih sawiin, mipui lut tam lutuk dang turin Lawngtlai DC, SP, Assam Rifles leh BSF te bakah NGO tang hovin theihtawp an chhuah dawn a ti.



CHAPCHAR KUT

Mizote kut pui ber leh ngaihhlut ber Chapchar Kut lawm mekah lemziak leh thlalak phochhuah runpui, Art & Photo Exhibition-chu vawiin khan Aizawl Vanapa Hall ah Information & Public Relations Secretary Pi Betsy Zothanpari'n a hawng.

Ni thum awh tur Chapchar Kut Art & Photo Exhibition hi Information & Public Relations (I&PR), Mizoram Art Development Society (MADS) leh Mizo Photographers' Society (MPS)-te buatsaih a ni.

Kan corr report lo ngaithla ang.

Chapchar Kut puala Exhibition-ah hian a vaiin lemziak leh thilsiam 107 phochhuah a ni a, chu'ng zingah chuan Pencil/Charcoal hmanga ziah 5; Mixed Media 3; Sculpture 3; Watercolour hmanga ziah 13; Acrylic hmanga ziah 80 leh Oil Painting 3 a tel a ni. MPS-te'n mi 39-te thlalak thehluh atanga thlanchhuah thlalak 126 an phochhuak bawk a ni.

Painting Exhibition bik hi kum 2012 atanga neih tan a ni a, Photography Exhibition hi kum 2016 atanga neih chhoh a ni a, Chapchar Kut 2026 Art & Photo Exhibition hian vawiin, March ni 11 atanga ni 13 thleng a awh dawn a. Tlawhtute tan lemziak leh thlalak phochhuahte hi lei theih a ni dawn a ni. MADS chuan hemi

*pual hian 'Zozia' tih thupui hmangin Art Camp an lo buatsaih tawh a, member 68-
te an tel a ni.*



SESSION-HORTI MINISTER

Horticulture Minister Pu C.Lalsawivunga'n kumin atangin ram leilung tichhe lo thei ang ber leh a hmun ngaia hun rei zawk sawhthing chin dan kalpui tura hmalak a nih thu House a hrilh.

Vawiin Assembly session-ah Horticulture Minister Pu C.Lalsawivunga chuan he hi sawiin, kumin atangin sustainable Mizo ginger cultivation a taka zirchianna demonstration district tinah kalpui an tum a, a ram leilung awmna hmun a zirin sawhthing chin dan chi hrang hrang kalpui turin hma an la mek a ti a, sawhthing, aieng leh hmarcha tih rona leh chan sawmna tur, Mizopa kut chhuak tapchhak leh rapchung technology te chu enchhin mek a nih thu sawiin, mithiamte chuan phai lam atanga siamchhuah aiin a tha zawk niin an sawi a ti.

